

Agayi

[Mokapo 1](#) – [Mokapo 2](#)

1 Mokapo 1

1. Na mbula ya mibale ya mokonzi Dareyos, na sanza ya motoba, na mokolo ya liboso ya sanza, liloba na Yawe eyaki na nzela ya loboko ya Agayi, profete, na Zorobabel, mwana na Salatieli, guvernere ya Yuda, pe na Yehosua, mwana na Yehosadaki, nganga monene ya Nzambe, koloba : 2. Yawe na mampinga alobi boye: Batu oyo balobi: tangu ekomi nanu te, tangu pona kotonga ndaku ya Yawe. 3. Pe liloba ya Yawe eyaki na nzela ya profete Agayi, koloba : 4. Ezali tangu pona bino moko bofanda na bandaku na bino oyo balatisi yango kitoko, nzokande ndaku oyo ezali ya kobebisama? 5. Sik'oyo, Yawe na mampinga alobi boye: Botiya mitema na bino na banzela na bino. 6. Bolonaki milona mingi, pe na bobuki bilanga, bozuaki muke; boliaki, kasi botondi te; bomelaki, kasi eloko te pona kotonda masanga; bino bolati bilamba, kasi moko te azali na molunge; pe ye oyo asalaka pona lifuti, azali kozua lifuti na saki etoboka. 7. Yawe na mampinga alobi boye: Botiya mitema na bino na banzela na bino. 8. Bomata na ngomba pe bomema mabaya, pe botonga ndaku; pe nakosepela na yango, pe nakokumisama, elobi Yawe. 9. Bozelaki mingi, pe tala, ezalaki kaka muke; pe bomemaki yango na ndaku, pe nafulaki likolo na yango. Na tina nini? elobi Yawe na mampinga. Na tina ya ndaku na ngai, oyo ebebi, - pe bino moko na moko akotala makambu ya ndako na ye. 10. Yango wana likolo na bino likolo ekangi mbula, pe mabele ekangi mbuma na yango; 11. Pe nabengaki bokawuki likolo ya mboka, likoloya bangomba, pe likolo ya ble, ya vino ya sika, ya mafuta kitoko, pe ya mbuma ya mabele, pe ya batu, pe ya bibwele, ya misala nionso ya maboko.

12. Zorobabel mwana ya Salaltiele, na Yehosua mwana ya Yehosadaki, nganga monene ya Nzambe pe ndambu ya batu nionso, bayokaki mongongo ya Yawe Nzambe na bango, pe maloba ya profete Agayi, ndenge Yawe, Nzambe na bango apesaki ye mokumba; pe batu babangaki liboso na Yawe. 13. Pe Agayi momemi-sango ya Yawe, alobi na batu na nzela ya sango ya Yawe, koloba: Nazali elongo na bino, elobi Yawe. 14. Pe Yawe alamusaki elimo ya Zorobabel mwana ya Salatiele, guvernere ya Yuda, pe elimo ya Yehosua mwana ya Yehosadaki, Nganga Monene ya Nzambe, pe elimo ya ndambu ya batu nionso. pe bayaki pe basalaki mosala na ndaku ya Yawe ya mampinga, Nzambe na bango. 15. mokolo mwa tuku mibale na minei ya sanza motoba ya mbula mibale na mokonzi Dareyos.

2 Mokapo 2

1. Na sanza ya sambo, na mukolo ya tuku mibale na moko ya sanza, liloba ya Yawe eyaki na nzela ya Agayi, Profete, na koloba : 2. Loba na Zorobabel mwana ya Salatiele, guverneri ya Yuda, pe na Yehosua mwana ya Yehosadaki, Nganga Monene ya Nzambe, pe na ndambu ya batu, na koloba : 3. Nani kati na bino, na ndambu oyo batikala amonaki ndaku oyo na kembo na yango ya liboso, pe ndenge nini bozali komona yango sik'oyo? Ezali lokola eloko te na misu na bino? 4. Kasi sik'oyo zala makasi, Zorobabel, elobi Yawe, pe zala makasi, Yehosua mwana ya Yehosadaki, Nganga monene ya Nzambe, pe bozala makasi, bino batu nionso ya mboka, elobi Yawe, pe bosala po nazali elongo na bino, yango nde liloba ya Yawe ya mampinga. 5. Elongu na liloba oyo nasalaki boyokani na bino tangu bobimaki na Ejipito, pe Molimo na ngai, afandi na kati na bino; bobanga te. 6. Pamba te Yawe na mampinga alobi boye: Lisusu mwa tangu, ekozala na tangu muke, pe nakoningisa likolo pe mabele, pe mayi ya monana pe mabele ekawuka; 7. Pe nakoningisa bikolo nionso. Pe eloko ya posa ya mabota nionso (biloko ya motuya/bozui ya bikolo nionso) ekoya, pe nakotondisa ndaku oyo na kembo, elobi Yawe na mampinga. 8. Palata ezali ya ngai, pe wolo ezali ya ngai, elobi Yawe na mampinga. 9. Kembo ya suka ya ndaku oyo ekozala monene koleka oyo ya liboso, elobi Yawe na mampinga, pe na esika oyo nakotia kimia, elobi Yawe na mampinga.

10. Na mukolo ya tuku mibale na mineyi ya sanza ya libwa, na mbula ya mibale ya Dareyos, liloba ya Yawe eyaki na nzela ya Agayi, profete, koloba : 11. Yawe na mampinga alobi boye: Botuna Banganga-Nzambe na tina ya Mobeko, koloba : 12. Soki mutu moko amemi mosuni mosantu na songe ya elamba na ye, pe na songe ya elamba na ye asimbacki lipa, to bileyi nionso, to vino, to mafuta, to eloko nionso oyo eliamaka, eloko oyo asimbi ekosantisama ? Pe banganga Nzambe bazongiselaki bango, koloba ete: Te. 13. Pe Agayi alobi: Soki mutu oyo azali mbindo na nzela ya ebembe asimbi eloko moko ya biloko oyo, akomi mbindo? Pe banganga Nzambe bazongiselaki bango ete: Ekozala mbindo. 14. Pe Agayi ayanolaki pe alobi: Batu oyo bazali bongo, pe ekolo oyo ezali bongo liboso na ngai, liloba ya Yawe, pe mosala nionso ya maboko na bango ezali bongo, pe oyo bazali kopesa ezali mbindo. 15. Pe sik'oyo, botia mitema na bino, nabondeli bino, wuta lelo pe mikolo ekoya : yambo batia libanga moko likolo ya mosusu na tempelo ya Yawe, 16. Yambo wana ezala, soki bazalaki koya pona liboke ya matuku tuku mibale, ezalaki zomi; soki bazalaki koya na ebombelo ya vino pona kobenda bamezire tuku mitanu, ezalaki tuku mibale; 17. Nabeti bino na kotumbama pe na kopola pe na mbula ya mabanga, na misala nionso ya maboko na bino; pe moko te kati na bino azongi epayi na ngai, elobi Yawe. 18. Nabondeli bino, botia mitema na bino, banda lelo pe mikolo ekolanda, banda mukolo ya tuku mibale na mineyi ya sanza ya libwa, banda mukolo oyo tempelo ya Yawe etongamaki; botia mitema na bino. 19. Milona ezali lisusu na esika ya kobomba yango? Ata nzete ya vino, pe nzete ya figi, pe nzete ya grenade, pe nzete ya olive, ebotaki mbuma te. Kobanda lelo nakopambola.

20. Liloba ya Yawe eyaki na nzela ya Agayi pona mbala ya mibale, na

mukolo ya tuku mibale na mineyi ya sanza, koloba : 21. Loba na Zorobabel, guvernere ya Yuda: Nakoningisa likolo pe mabele. 22. Nakokweyisa kiti ya bokonzi ya ba bokonzi, pe nakobebisa nguya ya ba bokonzi ya bikolo, pe nakokweyisa bashar pe baoyo bafandi likolo na yango; pe bampunda bakobomama, pe baoyo bamataka na yango, mutu na mutu na mopanga ya ndeko na ye. 23. Na mukolo wana, Yawe na mampinga alobi: Nakozwa yo, Zorobabel mwana ya Salatiele, mosali na nga, elobi Yawe, pe nakotia yo lokola kashe, po naponi yo, elobi Yawe na mampinga.